

ПРИМЉЕНО: 03.07.2025

| Орг. јед. | Број | Прилог | Вредност |
|-----------|------|--------|----------|
|           |      |        |          |

РЕПУБЛИКА СРБИЈА  
НАРОДНА СКУПШТИНА  
ПОСЛАНИЧКА ГРУПА

Pokret slobodnih građana (PSG) - Stranka demokratske akcije Sandžaka (SDA  
Sandžaka) - Partija za demokratsko delovanje (PDD)  
3. jul 2025. godine  
Beograd

PREDSJEDNICI  
NARODNE SKUPŠTINE

Na osnovu člana 107. stav 1. Ustava Republike Srbije („Službeni glasnik RS“, broj 98/2006 i 115/2021), člana 40. stav 1. tačka 1. Zakona o narodnoj skupštini („Službeni glasnik RS“, broj 9/2010) i člana 150. stav 1. Poslovnika Narodne skupštine („Službeni glasnik RS“, broj 20/2012 – prečišćen tekst) podnosimo **PRIJEDLOG REZOLUCIJE O GENOCIDU U SREBRENICI**, sa prijedlogom da se donese po hitnom postupku

NARODNI POSLANICI

Pavle Grbović  
*P. Grbović*

Ahmedin Škrijelj  
*A. Škrijelj*

Minela Kalender  
*Minela Kalender*

Anna Oreg  
*Anna Oreg*

Shaip Kamberi  
*Shaip Kamberi*

Vladimir Pajić  
*V. Pajić*

## PRIJEDLOG

Polazeći od Rezolucije Generalne skupštine Ujedinjenih naroda 78/282 o Međunarodnom danu promišljanja i sjećanja na genocid u Srebrenici od 23. maja 2024. godine,

Ističući privrženost duhu i normama Univerzalne deklaracije Ujedinjenih naroda o ljudskim pravima, Pakta o građanskim i političkim pravima, Europske konvencije o zaštiti ljudskih prava i osnovnih sloboda, Dopunskih protokola iz Ženevske konvencije o zaštiti žrtava u oružanim sukobima, Konvencije o spriječavanju i kažnjavanju zločina genocida i Statuta Međunarodnog krivičnog suda,

Poštujući i prihvatajući presude Međunarodnog krivičnog suda za bivšu Jugoslaviju, Međunarodnog rezidualnog mehanizma za krivične sudove, a naročito presudu Međunarodnog suda pravde, glavnog pravosudnog organa Ujedinjenih naroda, donijetu 26. februara 2007. godine u sporu po tužbi Bosne i Hercegovine protiv Srbije, kao pravne nasljednice Savezne Republike Jugoslavije i Državne zajednice Srbija i Crna Gora,

Rukovodeći se potrebom osiguranja trajnog i stabilnog mira i vraćanja povjerenja između država i naroda na prostoru bivše SFRJ,

Obavezujući se na poštovanje teritorijalnog integriteta i suvereniteta Bosne i Hercegovine, kao i drugih država na prostoru Zapadnog Balkana,

Imajući u vidu značaj suočavanja sa prošlošću u cilju pomirenja između srpskog i bošnjačkog naroda, ali i drugih naroda sa prostora bivše SFRJ,

Proklamujući vrijednosni sud o genocidu, etničkom čišćenju, ratnim zločinima i upotrebi sile za ostvarenje političkih ciljeva,

Izražavajući najdublji pijetet prema žrtvama genocida u Srebrenici,

Naglašavajući da je krivica za genocid, ratne i druge zločine individualna i da nijedan narod ne može biti kolektivno označen kao genocidan ili zločinački,

Afirmišući koncesiju i univerzalizam nasuprot averziji i antagonizmu a aktivnu životnu koegzistenciju nasuprot konfrontaciji,

Narodna Skupština Republike Srbije, na osnovu člana 99. stav 1. tačka 7. Ustava Republike Srbije i člana 8. stav 1. Zakona o narodnoj skupštini, donosi

**REZOLUCIJU**  
**O**  
**GENOCIDU U SREBRENICI**

1. Narodna skupština Republike Srbije najoštrije osuđuje genocid počinjen nad bošnjačkim narodom u Srebrenici jula 1995. godine
2. Proglašava se 11. jul za Dan sjećanja na genocid u Srebrenici. Dan sjećanja na genocid u Srebrenici obilježava se svake godine.
3. Narodna skupština Republike Srbije izražava saučešće i izvinjenje porodicama žrtava zbog toga što Republika Srbija nije spriječila genocid u Srebrenici, niti je kaznila počinioce.
4. Republika Srbija će svojim krivičnim zakonodavstvom osigurati adekvatnu kažnjivost za negiranje genocida u Srebrenici, ratnih i drugih zločina utvrđenih presudama relevantnih međunarodnih sudova, te kažnjivost za glorifikaciju

pojedina i organizacija koji su od strane relevantnih međunarodnih sudova oglašeni krivim za genocid u Srebrenici, ratne i druge zločine.

5. Potvrđuje se riješenost Republike Srbije da spriječi genocid i sve druge zločine i potvrđuje stavove završnog dokumenta Svjetskog Samita iz 2005. godine i odgovornosti za zaštitu stanovništva od genocida, ratnih zločina, etničkog čišćenja i zločina protiv čovječnosti.
6. Garantuje se ratifikacija i puna implementacija Konvencije o spriječavanju i kažnjavanju zločina genocida, ratnih zločina, etničkog čišćenja i zločina protiv čovječnosti i usvajanje zakona potrebnih za ispunjavanje obaveza iz te Konvencije.
7. Republika Srbija se obavezuje se da će iskoristiti sva raspoloživa sredstva i mehanizme da provede istragu, rasvijetli i kazni sve odgovorne za genocid u Srebrenici jula 1995. godine.
8. Naglašava se suštinski značaj pomirenja zasnovanog na dijalogu, suočavanju sa prošlošću i prosvijećenosti pravdi i podršci žrtvama, kao osnovi za jačanje sigurnosti, stabilnosti i prosperiteta u regionu.
9. Republika Srbija se obavezuje da će razvijati obrazovne programe, koji će budućim generacijama usaditi lekcije o svim negativnim posljedicama koje su proizašle iz genocida, ratnih zločina, etničkih čišćenja i zločina protiv čovječnosti u cilju spriječavanja njihove glorifikacije koje nesumnjivo dovode do stvaranja svijesti da se interesi sopstvenog naroda i države mogu ostvarivati na štetu drugog naroda i države.
10. Narodna skupština Republike Srbije potvrđuje značaj lekcije o neuspjehu da se spriječi genocid u Srebrenici, kao što je navedeno u izvještaju Generalnog sekretara UN-a, u skladu sa rezolucijom Generalne skupštine 53/35 i odlučuje da rano i efikasno djeluje kako bi se spriječilo ponavljanje genocida i u tu svrhu će se iskoristi sva raspoloživa sredstva.
11. Republika Srbija potvrđuje da kršenja ljudskih i manjinskih prava mogu biti rani pokazatelj mogućnosti genocida i u tom smislu se obavezuje na usvajanje

zakonskih i drugih pravno obvezujućih akata koja će nedvosmisleno garantovati zaštitu i puno ostvarivanje ljudskih i manjinskih prava i obezbijediti manjinama uslove za ostvarivanje prava na političku egzistenciju.

Ovu Rezoluciju objaviti u Službenom glasniku Republike Srbije

## **OBRAZLOŽENJE**

### **I USTAVNI OSNOV ZA DONOŠENJE REZOLUCIJE**

Ustavni osnov za donošenje ove rezolucije sadržan je u članu 99. stav 1. tačka 7. i stav 2. Ustava Republike Srbije, kojim je propisano da Narodna skupština donosi zakone i druge opće akte iz nadležnosti Republike Srbije i da vrši druge poslove određene Ustavom i zakonom, kao i u članu 8. stav 1. Zakona o Narodnoj skupštini ("Službeni glasnik RS", broj 9/10), kojim je, između ostalog, propisano da Narodna skupština donosi i rezoluciju.

### **II RAZLOZI ZA DONOŠENJE REZOLUCIJE**

Donošenje Rezolucije o genocidu u Srebrenici ima za cilj da se u Narodnoj skupštini Republike Srbije napravi prvi važan korak u pravcu rješavanja otvorenih pitanja između Republike Srbije i Bosne i Hercegovine, te srpskog i bošnjačkog naroda.

Usvajanje predložene rezolucije na 30-tu godišnjicu od izvršenog genocida nad bošnjačkim narodom u Srebrenici, od suštinskog je značaja za vraćanje povjerenja između srpskog i bošnjačkog naroda i vraćanja povjerenja u državne organe Republike Srbije.

Generalna skupština Ujedinjenih naroda, 23.maja 2024. godine, donijela je Rezoluciju 78/282 o Međunarodnom danu promišljanja i sjećanja na genocid u Srebrenici. Navedenom Rezolucijom 11. jul je proglašen kao Međunarodni dan promišljanja i sjećanja na genocid nad bošnjačkim narodom u Srebrenici jula 1995. godine.

Međunarodni sud pravde je presudom od 26. februara 2007. godine Republiku Srbiju proglasio krivom jer nije spriječila genocid u Srebrenici i nije kaznila počinioce, čime je Republika Srbija postala prva država koja je proglašena krivom za kršenje Konvencije UN o sprječavanju i kažnjavanju genocida.

Donošenjem gore navedene presude Međunarodnog suda pravde i presuda Međunarodnog krivičnog suda za bivšu Jugoslaviju Radovanu Karadžiću, Ratku Mladiću, Zdravku Tolimiru, Radislavu Krstiću, Dragu Nikoliću, Ljubiši Beari, Vujadinu Popoviću, Miloradu Trbiću, Radomiru Vukoviću i ostalima, osiguravaju se potrebni uslovi da Republika Srbija nakon usvajanja predložene rezolucije, odgovornost i krivicu za počinjeni genocid ali i za planiranje i realizaciju udruženog zločinačkog poduhvata individualizuje.

Imajući u vidu i presude Međunarodnog rezidualnog mehanizma za krivične sudove u Hagu, izrečene rukovodiocima tadašnje Službe državne bezbjednosti Republike Srbije, Jovici Stanišiću i Franku Simatoviću, koji su proglašeni krivim za učestvovanje u udruženom zločinačkom poduhvatu, te zločine počinjene u Bosni i Hercegovini posebno naglašavaju razloge za usvajanje i implementaciju predložene rezolucije.

Usvajanjem Rezolucije o genocidu u Srebrenici otvara se prostor za neophodnu implementaciju Konvencije o sprečavanju i kažnjavanju zločina genocida, ratnih zločina, etničkog čišćenja i zločina protiv čovječnosti kao i usvajanje zakona potrebnih za ispunjavanje obaveza iz te Konvencije.

Donošenjem ove Rezolucije, Republika Srbija nedvojbeno prihvata univerzalne vrijednosti i dostignuća koja su imanentna miroljubivim i tolerantnim društvima.

Prijedlog Rezolucije o genocidu u Srebrenici odbacuje kolektivnu odgovornost srpskog naroda za genocid počinjen nad bošnjačkim narodom u Srebrenici.

Priznavanje genocida u Srebrenici je civilizacijski korak koji je potreban Republici Srbiji kako bi potvrdila usmjerenje ka izgradnji povjerenja i trajnog mira u regionu zasnovanog na istini, prihvatanju djela iz prošlosti, suočavanju sa prošlošću i istrajnost ka pravdi, podršci žrtvama kao osnovi za jačanje sigurnosti, stabilnosti i prosperiteta u regionu.

Donošenjem ove Rezolucije proklamuje se i vrijednosni sud o izvršenom genocidu nad bošnjačkim narodom.

Insistirajući na poštovanju utvrđenih činjenica, na pravnoj i moralnoj osudi odgovornih za genocid nad Bošnjacima u Srebrenici, ova Rezolucija predstavlja i jasno distanciranje od politike etničkog čišćenja, negiranja zločina i sistemske zaštite odgovornih za genocid i druge zločine počinjene nad bošnjačkim narodom. Shodno tome, predložena rezolucija je od izuzetnog značaja za sve građane Republike Srbije, a naročito za većinski srpski narod. Usvajanjem predložene Rezolucije o genocidu u Srebrenici, Republika Srbija razvija koncept države kao sigurne kuće za mir, pravdu, prosperitet, slobodu i jednakost svakog pojedinca u pravednom, otvorenom i demokratskom društvu, zasnovanom na načelu vladavine prava i pravednih zakona. Usvajanjem Rezolucije o genocidu u Srebrenici napušta se do sada primjenjivani koncept koji koristi nasilje za ostvarivanje političkih ciljeva a politiku etničkog čišćenja prihvata kao svršen čin a Republiku Srbiju definiše kao sigurnu kuću za ratne zločince i prijetnju miru u stabilnosti u regionu.

### **III PROCJENA FINANSIJSKIH SREDSTAVA POTREBNIH ZA SPROVOĐENJE REZOLUCIJE**

Za sprovođenje ove rezolucije nisu potrebna dodatna finansijska sredstva u budžetu Republike Srbije.

### **IV RAZLOZI ZA DONOŠENJE PO HITNOM POSTUPKU**

11. jula 2025. godine navršava se 30 godina od genocida koji je izvršen nad Bošnjacima u Srebrenici. Generalna skupština UN-a, 23. maja 2024. godine, donijela je Rezoluciju 78/282 o Međunarodnom danu promišljanja i sjećanja na genocid u Srebrenici. Navedenom Rezolucijom 11. jul je proglašen kao Međunarodni dan promišljanja i sjećanja na genocid izvršen nad bošnjačkim narodom u Srebrenici jula 1995. godine. Genocid izvršen nad bošnjačkim narodom u Srebrenici utvrđen je presudama sudova osnovanih od strane UN-a, odnosno Međunarodnog suda pravde, Međunarodnog krivičnog suda za bivšu Jugoslaviju i Međunarodnog rezidualnog mehanizma za krivične sudove. Obaveza Narodne skupštine Republike Srbije da donese Rezoluciju o genocidu u Srebrenici, po hitnom postupku, pored navedenog zasnovana je i na činjenici da je Republika Srbija presudom Međunarodnog suda pravde (glavnog sudskog organa UN-a) od 26. februara 2007. godine proglašena krivom jer nije spriječila genocid u Srebrenici i nije kaznila počinioce genocida u Srebrenici.